

Předsydka Rady za serbske naležnosće w Swobodnym staće Sakskej Marja Michałkowa reaguje na přinošk SN wo iniciatiwnej skupinje za Serbski sejm „Ministerka pomoc přilubiła“:

26. januara 2016 bě w Serbskich Nowinach wozjewjene, zo ministerka dr. Eva-Maria Stange iniciatiwnu skupinu za legitimowane zastupnistwo Serbow – Serbski sejm – podpěruje. Zastupjerjo Rady za serbske naležnosće w Swobodnym staće Sakskej so dźiwaja. Čehodla?

Mějachmy jako serbska rada Sakskeje 21. januara swoje regularne posedženje w krajnym sejmje. Mjez druhim smy so ze statnej ministerku, knjeni Stange, wobšěrnje rozmołweli. SN wo tym rozprawjachu. Wězo su so čłonojo serbskeje rady ministerki prašeli, što k idejam iniciatiwneje skupiny měni. Wona nam cyle jasnje wotmołwi – a tak steji to w protokolu posedženja –, zo so do wěcowneje diskusije Serbow njeměša. Wo tym maja Serbja sami rozsudzić. Tohodla nas rozprawa w SN zadžiwa. Njemóžu sej předstajíc, zo ministerka tak rozdźělnej měnjeni zastupuje.

Kaž so w SN rozprawja, je ministerka dr. Stange podpěru přilubiła, zo by fairny dialog nastał. Po našich faktach wěmy, zo je so Domowina wospjet z iniciatiwnej skupinu zetkała.

Hdyž je ministerka přilubiła dialog dale podpěrać, da je to hinaše měnjenje hač te, kotrež je wona Radže za serbske naležnosće napřečo zwurazniła. Serbska rada wobroći so tuž nětko z listom na ministerku nastupajo wujasnjenje.